

QUINZIÈME ÉNIGME



*QUI m'approche plus pres je le picque le mieux,  
Et si bien que souvent il en vient une enflure,  
Par l'œuvre de mon cul je reçois grande injure,  
Encore qu'il soit propre aux jeunes & aux vieux.*

*Il est si bon, si beau, si sain, si douxereux,  
Qu'alors qu'on veult cueillir la fleur viergenment pure,  
On s'assemble entre amis, on entend, on murmure,  
Dont le bruit resonnant est rustique & joyeux.*

*J'illumine la nuict par ma lourde matiere,  
Necessaire aux vivans, convenable à leur biere,  
Mesmes les maistres dieux s'en servent jour & nuict.*


*Plusieurs autres vertus admirables j'enfante,  
Mais mon bien savoureux est d'humeur si gluante,  
Qu'aucuns trop delicats mesprisent ce bon fruit.*

*EXPLICATION  
DE LA QUINZIÈME ÉNIGME*


1. une abeille.

1. poêle.

**C'**EST une mousche à miel<sup>1</sup>, qui picquant fait enfler où son esguille a touché, elle se plainct qu'on luy fait tort de luy oster son miel qu'elle a faict de son cul. Ce miel est sain à toute personne de quelque age qu'elle soit; quand on le va querir aux ruches, on est plusieurs, & l'on sonne quelque poille<sup>2</sup> ou chauderon, pour à ce bruit resonnant plaire à ces petits animaux qui aimeroyent encore mieux la musique du luth ou des violons: par la cire on fait des flambeaux qui donnent une clarté la nuict, laquelle sert aux Églises, on en fait cierges & chandelles dont on honore les defuncts; les Temples en sont decorez. Ce miel & ceste cire ont plusieurs singulieres vertus (voy la Medecine) mais le miel gluant desplaist à quelques personnes delicates.



**SEIZIÈME ÉNIGME**



***B**IEN que je sois petit, si suis-je aimé des grands,  
Toutesfois le commun gros & long me desire,  
Mais pour sembler plus doux on me tourne, on me vire,  
On me touche, on me frotte avant qu'entrer dedans.*

*Estant là je m'enflame & amortis mes sens,  
Dont j'amoindris beaucoup, & si n'en suis pas pire,  
J'entre en ce lieu bien dur, bien mol on me retire,  
En rendant une humeur agreable aux aimans.*

*J'engendre quelquesfois, mais ceste geniture  
Cause un visage honteux, un brocardant' murmure,  
Dont on la desadvouë helas! le plus souvent,*


*En diverses façons on jouyst de ma vie,  
Mesmes les animaux en passent leur envie,  
Et si tousjours mon bien se convertist en vent.*

1. moqueur.

*EXPLICATION  
DE LA SEIZIÈME ÉNIGME*

1. navet.

**C'**EST un Naveau<sup>1</sup>, qui tout petit qu'il est, est aimé des Seigneurs, bien que la populace l'aimast mieux gros; pour le bien manger, il le faut rascler, frotter & laver avant que le mettre dans le pot, & bouillant là il s'eschauffe, s'amoindrisant, n'en estant pas plus mauvais. On le met dur au pot, on l'en retire mol & rend un bon bouillon, qui plaist à ceux qui aiment les Naveaux. Ce qu'il engendre le plus souvent c'est un pet, qui est chose que ceux qui le font rougissent de honte & le desadvoüent. On mange des Naveaux diversement, au beurre, à la moustarde, fricassez, & les animaux en repaisent; comme porcs, poulets d'Inde, & son aliment objecte force ventositez.



**DIX-SEPTIÈME ÉNIGME**



***D**U premier mal je suis la seule flamme,  
Et toutesfois on me veult tous les jours,  
Estant encore ennemie aux Amours,  
Je suis pourtant aimée de la femme.*

*Par ma froideur un monde se r'enflame,  
De mon pays je suis le vray secours,  
L'estranger mesme a devers moy recours,  
Lors qu'Osiris<sup>1</sup> nous cache sa bonne ame.*

*Un chacun va ma beauté regardant,  
Quand les Jumeaux au Cancre<sup>2</sup> vont cedant,  
L'on me void chere, on a de moy grand'cure.*

*Ma couleur est diverse & mon humeur,  
Ronde je suis (parfaicte est la rondeur)  
Et suis pourtant mauvaise de nature.*

1. Dieu des forces végétales, de la fécondité de la terre.


1. des Gémeaux au Cancer.

*EXPLICATION  
DE LA DIX-SEPTIÈME ÉNIGME*

**C'** EST la Pomme, qui fust cause du premier peché. La femme ne laisse pas de la desirer, encore qu'elle soit contraire à l'Amour. La Normandie & autres cartiers usent fort de citre<sup>1</sup>, dont on s'enyvre, & fait grand bien aux contrées où elle vient: car les estrangers vont achepter ce breuvage lors que les vignes ont eu quelque fortune<sup>2</sup>. Chacun aime ce fruct, & au commencement de Juin pour sa rareté la pomme est trouvée plus exquise. Elle est diverse d'odeur & couleur, elle est ronde, & encore que la rondeur soit parfaite à tout prendre, elle ne vault rien estant maleficiante.

1. cidre.

2. malheur.



**DIX-HUITIÈME ÉNIGME**